

Evening Dogri (NSD) Bulletin 17-08-2024

आकाशवाणी

खास खास खबरां

- 1 प्रधानमंत्री नरेन्द्र मोदी होरें ग्लोबल साउथ दे मुल्खें गी इक –दुए दी ताकत बनने लेई इक–जुट होने दा आह्वान कीता ऐ।
- 2 विदेश मंत्री डॉ. एस.जयशंकर होरें विकास शील मुल्खें गी घट्ट लागत पर माली सहूलत ते महत्वै आली टैक्नालोजिएं दी सहूलत देने लेई ग्लोबल साउथ मुल्खें गी इक परोआर दे तौर पर किट्ठे कम्म करने दी अपील कीती ऐ।
- 3 केन्द्री मंत्री अर्जुन राम मेघवाल होरें आखेआ ऐ जे भारतीय न्याय संहिता मुल्खै दे अपराधिक न्याय सरिस्ते गी भलेआं अज्जै कल्लै दा बनाई देग।
- 4 केन्द्री सेहत मंत्री जेपी.नड्डा होरें मंकीपाक्स बमारी गी लेइयै हालात दा जायजा लैता ऐ।
- 5 केन्द्री सेहत मंत्रालय नै विरोध प्रदर्शन करा करदे डाक्टरें गी उंदी सुरक्षा हिफाजत गी जकीनी बनाने लेई सब्बै जतन करने दा भरोसा दितता ऐ। मंत्रालय नै लोकें दे हित गी दिक्खदे होई डाक्टरें गी अपनी ड्यूटी पर वापस जाने दी अपील कीती ऐ।

<><><><><><><>

PM-Global South

प्रधानमंत्री नरेन्द्र मोदी होरें ग्लोबल साउथ दे मुल्खें गी इक्क–मिक्क होने ते कन्नै इक दुए दी ताकत बनने दा आह्वान कीता ऐ। अज्ज त्रीए “वायस ऑफ ग्लोबल साउथ” सम्मेलन च वर्चुअल ढंगे नै हिस्सा लेंदे होई मोदी होरें आखेआ जे मजूदा यक्कोतक्की आला माहोल ते चुनौतियां पूरी दुनिया लेई इक बड्डा चिंता दा विषय ऐ। उनें गलाया जे दुनिया अजें मसां कोविड दी मार कारण

लग्गी दी पछाड़ कोला उभरने दी कोशत करा करदी ऐ ते बक्ख क्षेत्रें च बनने आली टकराव ते गतिरोध आली स्थिति नै ग्लोबल साउथ दे मुल्खें लेई, उंदी विकास यात्रा च चुनौतियां खड़ी करी दित्ती दियां न। मोदी होरें जोर देइयै आखेआ जे एह मुल्ख जलवायु परिवर्तन दे कन्नो कन्नी सेहत सुरक्षा, खाद्य सुरक्षा ते ऊजा सुरक्षा जनेइएँ चिंताएँ दा सामना करा करदे न। प्रधानमंत्री मोदी होरें आखेआ जे आतंकवाद, उग्रवाद ते बक्खवाद बी हर समाज लेई बड़डा खतरा बने दे न। उनें प्रौद्योगिकी दी बंड ते इत्त सरबन्धी नमीं आर्थिक ते समाजिक चुनौतिएँ दा बी जिक्र कीता। मोदी होरें भरोसा दोआया जे भारत नै ग्लोबल साउथ दे सब्बने मुल्खें कन्नै अपनिएँ छमताएँ ते तजुर्बे गी सांझा करने लेई पक्का निश्चा कीते दा ऐ। उनें बपार, समावेशी विकास, सतत विकास दे लक्ष्यें गी हासल करने लेई जतनें गी रफ्तार देने ते कन्नै महिलाएँ दे नेतृत्व च विकास गी बढ़ावा देने लेई भारत दे पक्के धेइयै दा बी जिक्र कीता। उनें आखेआ जे हाल दे किश बरें च बुनियादी ढांचे ते डिजीटल ऊर्जा संपर्क दे राएँ ग्लोबल साउथ दे साथ सैह्योग गी बढ़ावा दित्ता गेआ ऐ। प्रधानमंत्री होरें आखेआ जे मिशन लाइफ दे तैहत भारत नै नां छड़ा मुल्खै च सगुआं भ्याल मुल्खें पर बी रूफटॉप सोलर ते नमींकरनी ऊर्जा उत्पादन गी तरजीह दित्ती ऐ ते ग्लोबल साउथ दे बक्ख-बक्ख मुल्खें गी यूपीआई कन्नै जोड़ने दे जतन तेज करी दित्ते न। उनें जिक्र कीता जे शिक्षा, समर्थ निर्माण ते हुनर विकास दे क्षेत्र च ग्लोबल साउथ दे मिंबर मुल्खें कन्नै सांझेदारी च सराहने जोग प्रगति होई ऐ। उनें ग्लोबल साउथ यंग डिप्लोमैट फोरम दी शुरूआत दा जिक्र करदे होई आखेआ जे ग्लोबल साउथ एक्सीलेंस सेंटर छमता निर्माण, कौशल विकास ते ज्ञान सांझा करने दा कम्म करा'रदा ऐ।

<><><><><><>

EAM Global South

विदेश मंत्री डॉ.एस.जयशंकर होरें ग्लोबल साउथ दे मुल्खें गी आखेआ ऐ जे ओह इक परोआर दे तौरा पर रलियै कम्म करन तां जे घट्ट सूद उप्पर पैसा मुहैया

कराया जाई सकै ते मती जरूरी तकनीकें च सहूलियत कीती जाई सकै। अज्ज ग्लोबल साउथ समिट दे त्रीए सम्मेलन च विदेश मंत्रिणं दे पैहले सैशन च बोलदे होई डॉ. जयशंकर होरें आखेआ जे ग्लोबल साउथ दे मुल्खें उप्पर खास तौरा उप्पर मते सारे टकराव, तनाह ते दबाह दा असर ऐ जेहूदे कन्नै दुनिया जूझै करदी ऐ। उनें इस गल्ला उप्पर लोह पाई जे विचारें दे आदान—प्रदान दा मकसद इस प्रक्रिया दे राणं साढे हितें गी परिभाशत करना ऐ। बचार—बमर्श लेई चार विषय पेश करदे होई डॉ. जयशंकर होरें आखेआ जे अंतरराष्ट्री अर्थबवस्था गी जोखिम थमां मुक्त करने लेई बक्ख—बक्ख डोमेन च अपने आप च उत्पादन च विविधिता आहनने दी सख्त लोड़ ऐ।

<><><><><><>

Grey Global South Summit

ईराक नै त्रिए वायस ऑफ ग्लोबल साउथ शिखर सम्मेलन दी मेजबानी लेई भारत सरकार दी तरीफ कीती ऐ। ईराक दे उप—प्रधानमंत्री ते विदेश मंत्री फुआद हुसैन होर अज्ज वर्चुअल ढंगै कन्नै इस सम्मेलन च शामिल होए। इस शिखर सम्मेलन दा विषय ऐ—ठिकाऊ भविक्ख लेई कुल संसारी दक्खन गी बाख्तेयार करना। उनें जोर देइयै आखेआ जे इराक ग्लोबल साउथ दा इक अन्नत्रुट हिस्सा बने दा ऐ ते सब्बने लेई इक स्थाई ते खुशहाल भविक्ख लेई सांझे नजरियै दा पक्का धेइया करदा ऐ। श्री हुसैन होरें जलवायु परिवर्तन, ऊर्जा सुरक्षा ते ठिकाऊ विकास जनेह महत्वै आले मसलें दे नबेड़े लेई विकास पाए दे मुल्खें कन्नै किट्ठे रलियै कारवाई करने बारे गल्लबात कीती।

<><><><><><>

Bhartya Nyay Sanhita

केन्द्री विधि ते न्याय मंत्री अर्जुन राम मेघवाल होरें अज्ज आखेआ ऐ जे अगले 5एं ब'रें च भारतीय न्याय संहिता देश दी अपराधिक न्याय बवस्था च होर बेहतरी

आहन्नियै इसी भलेयां अज्जै कल्लै दिएं जरूरतें मूजब बनाई देग। अज्ज केरल हाई कोर्ट दे केन्द्र सरकार परिषद दे राज्य स्तरै दे सम्मेलन दा उद्घाटन करदे होई मेघवाल होरें आखेआ जे तुरत ते असरदार न्याय सब्बने नागरिकें दा बुनियादी अधिकार ऐ। उनें इनें आरोपें दा खंडन कीता जे भारतीय न्याय संहिता बिजन सुझाएं ते बिजन सलाह मशवरा जां तैआरी कीते प्रस्तावित होई ऐ। मंत्री होरें आखेआ जे 2019 थमां गै हितधारकें बक्ख-बक्ख स्तरें दी गल्लबात, सलाह सूत्र ते सुझाएं पर सोच बचार करने दे परैंत गै भारतीय न्या संहिता गी आंदा गेआ ऐ।

<><><><><><>

Health

केन्द्री सेहत मंत्रालय नै आखेआ ऐ जे मुल्खै च ऐल्लै तोड़ी मंकीपॉक्स दा कोई बी मामला सामने नेई आया ऐ। विश्व सेहत संगठन आस्सेआ मंकीपॉक्स गी अंतर्राष्ट्रीय सेहत सरबन्धी अमरजेंसी घोषत करने मगरा सेहत मंत्री जे.पी.नड्डा होरें अज्ज नमीं दिलली च इक मीटिंग व मंकीपॉक्स बारे हालात ते तैआरिएं दा जायजा लैता। मीटिंग दरान बमारी गी फैलने थमां रोकने ते एहदी रोकथाम लेई एहतियाती उपाह कीते जाने दा फैसला लैता गेआं एहृदे च कुसै मरीज दे सामने आने पर सब्बने हवाई अड्डे, बंदरगाहें ते जमीनी रस्तें पर सेहत सरबन्धी इकाइएं गी संवेदनशील बनाने, जांच प्रयोगशाला गी तैआर करने ते प्रबंधन लेई सेहत सहूलतां तैआर रखना शामिल ऐ।

<><><><><><>

VP-Economic

उपराश्ट्रपति जगदीप धनखड़ होरें अज्ज मुल्खै गी आर्थिक राश्ट्रवाद गी अपनाने दा आह्वान कीता ऐ। उनें औद्योगिक, बपार ते कारोबार सरबन्धी क्षेत्रेंग ी टाले जाई कसने आले आपात दी थाहर मकामी उत्पादन गी पैहल देने दी अपील

कीती। आर्थिक राष्ट्रवाद गी स्वदेशी ते वोकल फॉर लोकल दे पैहलू दे बचार पर जोर दिंदे होई श्री धनखड़ होरें अर्थबवस्था पर गैर जरूरी आयात दे माड़े असर दा जिक्र कीता। उनें विदेशी मुद्र दे निकास ते भारतीय कम्मगारें दे नौकरी दे मौके दित्ते जाने दी बी गल्ल कीती। उपराश्ट्रपति होर स्वर्ण भारत ईस्ट, वेंकटनलम च भाषण देआ करदे हे।

<><><><><><>

Indian Economy

अंतर्राष्ट्रीय माली फंड आईएमएफ दी पैहली उपप्रबंध निदेशक डॉ. गीता गोपीनाथ होरें आखेआ ऐ जे पिछले माली ब'रे 2023–24 दरान भारत दी बाढ़े दी दर मेद कोला मती खरी रेई ऐ। ते 2027 तोड़ी भारत दुनिया दी त्री सब्बने कोला बड़्डी अर्थबवस्था बनी जाग। गोपीनाथ होरें नमीं दिल्ली च इक प्राइवेट चैनल गी दित्ते गेदे इंटरव्यू च इस गल्ला दा जिक्र कीता जे भारत गी अगले 5–6एं ब'रें च रोजगार दे लक्खां बाढ़ू मौके पैदा करने दी जरूरत ऐ। उनें आखेआ जे आईएमएफ गी मेद ऐ जे प्राइवेट खपत च सुधार होग ते खरी बरसांत होने कन्नै फसलें दी पैदावार च बाढ़ा होग। गोपीनाथ होरें आखेआ जे दऊं टायरी गड्डिएं दी बिक्री थमां लेइयै तेजी कन्नै बधदे उपभोक्ता समेयान तोड़ी भारत च कुल खपत च बाढ़ा होआ करदा ऐ। सोसाइटी ऑफ इंडियन ऑटोमोबाइल मैनुफैक्चरर्स दे नमें आंकड़े मताबक पिछले म्हीने यात्री गड्डिएं, त्रऊ टायरें आली गड्डिएं, दऊं टायरें आली गड्डिएं ते क्वाड्रिसाइकिल दा कुल उत्पादन 24 लक्ख 37 ज्हार यूनिट थमां मता ऐ।

<><><><><><>

Rijiju

संसदीय मामले दे केन्द्री मंत्री किरण रिजिजू होरें आखेआ ऐ जे कोलकाता च इक मैडिकल कालेज ते अस्पताल च इक डाक्टर दे बलात्कार ते हत्या दी वारदात कन्नै नां छड़ा सेहत कर्मिएं गी सगुआं समूलचे राष्ट्र गी चेंता बनी दी ऐ। अज्ज

भूवनेश्वर च समाचार माध्यमें कन्नै गल्लबात करदे होई उनें आखेआ जे इस घटना मगरा सुरक्षा—हिफाजत गी लेइयै चैंता बनी दी ऐ ते छड़ा प्रभावत मैडिकल अमले दा मसला नेई ऐ। श्री रिजिजू होरें एह बी आखेआ जे पच्छम बंगाल च होई दी इस वारदात गी लेइयै लोकें च गुस्सा ऐ ते केन्द्री सेहत मंत्रालय नै लोड़चदियां गैंइयां पुटिटियां न।

<><><><><><>

Rajnath Visit

रक्षा मंत्री राजनाथ सिंह होर कल चेन्नई दे दौरे दरान भारती तटरक्षक बलें दे इक नमें आधुनिक समुंद्री बचाव समन्वय केन्द्र दा उद्घाटन करगंनं रक्षा मंत्री होर चेन्नई च समुंद्री प्रदूषण प्रतिक्रिया केन्द्र ते पुदुचेरी च तटरक्षक बल दे एयर एनक्लेव दा बी उद्घाटन करगंन। चेन्नई बंदरगाह उप्पर स्थित प्रदूषण केन्द्र समुंद्री प्रदूषण प्रबंधन च इक अगड़ी गैंह दा प्रतिनिधित्व करदा ऐ।

<><><><><><>

DEF-Paradrop

भारती ब्हाई फौज ते भारतीय सेना नै सांझे तौरा पर 15 ज्हार फुट दी उंचाई आले इलाके च क्रिटिकल ट्रॉमा केयर क्यूब दा पैहली बारी पैरा ट्रॉप आपरेशन कीता। इनें क्रिटिकल ट्रॉमा केयर क्यूब्स गी भारत सेहत पैहल प्रोजेक्ट “भीषम” दे तैहत स्वदेशी रूप कन्नै तैआर कीता गेआ ऐ। रक्षा मंत्रालय नै आखेआ ऐ जे एह आपरेशन प्रधानमंत्री नरेन्द्र मोदी हुंदे मनुक्खी सहायता ते आपदा प्रभावत क्षेत्रें च महत्वपूर्ण सेवां उपलब्ध कराने लेई आयोजित कीता गेआ। आपरेशन दरान भारतीय ब्हाई फौज नै क्यूब गी एयरलिफ्ट करने ते भलेया स्टीक रूप कन्नै पैरा ट्रॉप करने लेई अपने उन्नत सामरिक परिवहन विमान—सी—130 जे सुपर हरक्यूलिस दा इस्तेमाल कीता।

<><><><><><>

Earth Science Olympiad

चीन दे बीजिंग च आयोजित 17में अंतराष्ट्रीय धरती विज्ञान ओलंपियाड च भारती विद्यार्थिं दी इक टीम नै 3 सुन्ने दे, 2 चांदी दे ते 3 कैह दे तगमे जित्ते न। एह आयोजन 8 थमां 16 अगस्त तगर आयोजित कीता गेआ हा। गुजरात, केरल, छत्तीसगढ़ ते राजस्थान दे विद्यार्थिं दी चार सदस्यीय भारती टीम नै एह तगमें त्रै बक्ख-बक्ख श्रेणिं च जित्ते न। जेहूदे च धरती प्रणाली परियोजना ते अंतराष्ट्रीय टीम दायर कीती गेदी जांच शामिल ऐ। धरती विज्ञान दे राज्य मंत्री डॉ. जितेन्द्र सिंह होरें भारती टीम गी देसै दा मान बधाने लेई बघाई दित्ती ते कन्नै उंदी सराहना कीती। अंतराष्ट्रीय धरती विज्ञान ओलंपियाड इक विद्यार्थी केन्द्रित कार्यक्रम ऐ जेहड़ा धरती विज्ञान मंत्रालय दी रीचआउट योजना दे तैहत औंदा ऐ।

<><><><><><>